

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na 77. sjednici Predstavničkog doma, održanoj 12. maja 2010. godine i na 46. sjednici Doma naroda, održanoj 28. maja 2010. godine, usvojila je

**ZAKON**  
**O IZMJENAMA I DOPUNAMA ZAKONA O OSNOVAMA SIGURNOSTI SAOBRAĆAJA**  
**NA PUTEVIMA U BOSNI I HERCEGOVINI**  
**(„Službeni glasnik BiH“, 48/10 od 14.06.2010. godine)**

Član 1.

U Zakonu o osnovama sigurnosti saobraćaja na putevima u Bosni i Hercegovini ("Službeni glasnik BiH", br. 6/06, 75/06, 44/07 i 84/09), u cijelom tekstu, u odgovarajućim padežima:

- a) riječi: "vozila na motorni pogon" zamjenjuju se riječima: "motorna vozila";
- b) riječi: "vozač instruktor" zamjenjuju se riječima: "instruktor vožnje";
- c) riječ "nesreća" zamjenjuje se riječju "nezgoda";
- d) riječi: "bicikl s motorom" zamjenjuju se riječju "moped".

Član 2.

U članu 2. iza stava (1) dodaju se novi st. (2), (3) i (4) koji glase:

"(2) Kontrolu i reguliranje saobraćaja na putevima u Bosni i Hercegovini vrše ovlaštena lica nadležnog organa unutrašnjih poslova (u daljnjem tekstu: ovlaštena lica).

(3) U blizini škole, preventivno reguliranje saobraćaja mogu vršiti i školske saobraćajne patrole, uz prisustvo ovlaštenog lica iz stava (2) ovog člana.

(4) Bliže odredbe o načinu formiranja i radu školskih saobraćajnih patrola propisuju organi entiteta, kantona i Brčko Distrikta nadležni za obrazovanje".

Član 3.

U članu 5. iza stava (1) dodaje se novi stav (2) koji glasi:

"(2) Radi zaštite života i zdravlja djece, škole, obdaništa i druge ustanove u kojima se realizira vaspitno-obrazovni rad s djecom, kroz nastavne planove i programe, organiziraju pripremu djece za učešće u saobraćaju".

Član 4.

U članu 8. stav (1) na kraju teksta tačka se zamjenjuje zarezom i dodaju se riječi: "ili radi održavanja sportskih i drugih priredbi ili aktivnosti na putevima".

Član 5.

U članu 9. tač. 4) i 5) mijenjaju se i glase:

"4) **moped** je motorno vozilo s dva točka čija radna zapremina motora nije veća od 50 cm<sup>3</sup>, a snaga kod električnih motora ne prelazi 4kW, ili na tri točka, čija radna zapremina motora nije veća od 50 cm<sup>3</sup>, ili snaga motora kod motora s unutrašnjim sagorijevanjem i električnih motora nije veća od 4kW, i koje na ravnom putu ne može razviti brzinu veću od 45km/h;

5) **laki motocikl** je motorno vozilo s dva točka ili s tri asimetrično postavljena točka (s bočnom prikolicom), čija je zapremina motora veća od 50 cm<sup>3</sup> i ne prelazi 125 cm<sup>3</sup>, a snaga motora ne prelazi 11 kW i koji na ravnom putu može razviti brzinu veću od 45km/h;"

U tački 6) riječi: "lakih motocikala s motorom" zamjenjuju se riječju "mopeda".

Iza tačke 9) dodaju se nove tač. 9a), 9b), 9c) i 9d) koje glase:

"9a) **četverocikl** je motorno vozilo na četiri točka s masom neopterećenog vozila manjom od 400kg, bez mase akumulatora kod električnih vozila i čija najveća netosnaga motora ne prelazi 15kW;

9b) **evropski izvještaj** o saobraćajnoj nezgodi je propisani obrazac koji učesnici u saobraćajnoj nezgodi popunjavaju nakon saobraćajne nezgode;

9c) **instruktor vožnje** je lice koje je steklo uvjete da obavlja osposobljavanje iz upravljanja motornim vozilom;

9d) **ispitivač** je lice koje je steklo uvjete da vrši ispitivanje iz poznavanja propisa o sigurnosti saobraćaja na putevima ili iz upravljanja motornim vozilom;"

Iza tačke 16) dodaje se nova tačka 16a) koja glasi:

"16a) **kontrolor tehničke ispravnosti** je lice koje je steklo uvjete da na stanici tehničkog pregleda vrši kontrolu tehničke ispravnosti vozila;"

Tačka 17) briše se.

Tačka 19) mijenja se i glasi:

"19) **laki četverocikl** je motorno vozilo s četiri točka s masom neopterećenog vozila manjom od 350 kg, bez mase akumulatora kod električnih vozila, čija najveća brzina nije veća od 45km/h i čija radna zapremina nije veća od 50 cm<sup>3</sup> ili čija najveća snaga nije veća od 4kW kod ostalih motora, ili čija najveća trajna snaga nije veća od 4kW kod elektromotora;"

Tačka 27) mijenja se i glasi:

"27) **motocikl** je motorno vozilo s dva točka ili s tri asimetrično postavljena točka (s bočnom prikolicom), kod koga je radna zapremina motora veća od 125 cm<sup>3</sup> i koje na ravnom putu može razviti brzinu veću od 45km/h;"

Tačka 30) mijenja se i glasi:

"30) **motorno vozilo** je vozilo koje se pokreće snagom sopstvenog motora i koje je prvenstveno namijenjeno za prijevoz lica ili tereta na putevima, ili vuču priključnog vozila, osim vozila koja se kreću po šinama i pomoćnih pješačkih sredstava;"

Tačka 32) mijenja se i glasi:

"32) **naselje** je prostor na kome se redovi ili grupe zgrada nalaze s jedne ili s obje strane puta, dajući mu izgled ulice i čije granice određuje nadležni organ za upravljanje putevima saobraćajnim znakovima za obilježavanje naseljenih mjesta;"

Iza tačke 36) dodaju se nove tač. 36a) i 36b) koje glase:

"36a) **odstojanje** je najkraća uzdužna udaljenost između najisturenijih tačaka vozila ili lica, odnosno drugih objekata;

36b) **oldtimer** je motorno vozilo proizvedeno prije trideset i više godina, koje je radi njegovanja historijskih naslijeđa i tehničke kulture sačuvano ili ponovo sastavljeno u izvornom obliku;"

Tačka 38) mijenja se i glasi:

"38) **osovinsko opterećenje** je dio ukupne mase vozila koja se preko osovina vozila prenosi na vodoravnu podlogu u stanju mirovanja vozila;"

Iza tačke 45) dodaje se nova tačka 45a) koja glasi:

"45a) **predavač** je lice koje je steklo uvjete da vrši osposobljavanje iz poznavanja propisa o sigurnosti saobraćaja na putevima;"

Tačka 48) mijenja se i glasi:

"48) **saobraćajna dozvola** je javna isprava koju je izdao nadležni organ i kojom se dokazuju vlasništvo i period važenja registracije određenog vozila, njegove tehničke i druge osobine i karakteristike;"

Iza tačke 52) dodaju se nove tač. 52a) i 52b) koje glase:

"52a) **priključak za izvođenje radova** je izmjenjivo oruđe koje služi za obavljanje poljoprivrednih, šumskih ili drugih radova, i koje se u svrhu izvođenja radova postavlja ili priključuje na motorno vozilo;

52b) **priključno vozilo za traktor** je priključno vozilo koje je namijenjeno da ga vuče isključivo traktor;"

Tačka 56) mijenja se i glasi:

"56) **saobraćajna nezgoda** je događaj na putu ili koji je započet na putu, u kojem je učestvovalo najmanje jedno vozilo u pokretu i u kojem je jedno ili više lica poginulo ili povrijeđeno ili je nastala materijalna šteta;"

Tačka 58) mijenja se i glasi:

"58) **saobraćajna traka za prinudno zaustavljanje vozila** je obilježeni uzdužni dio kolovoza na autoputevima i na određenim mjestima na putevima višeg ranga, kao i u tunelima i galerijama, namijenjena za prinudno zaustavljanje vozila;"

Iza tačke 61) dodaju se nove tač. 61a) i 61b) koje glase:

"61a) **sistem provjere sigurnosti** (RSI - *Road Safety Inspection*) predstavlja proceduru nezavisne provjere postojećih javnih puteva u pogledu sigurnosti;

61b) **sistem revizije sigurnosti** (RSA - *Road Safety Audit*) predstavlja proceduru nezavisne revizije projekata izgradnje javnih puteva u pogledu sigurnosti;"

Iza tačke 63) dodaje se nova tačka 63a) koja glasi:

"63a) **rastojanje** je najkraća bočna udaljenost između najisturenijih tačaka vozila ili lica, odnosno drugih objekata;"

Iza tačke 68) dodaju se nove tač. 68a) i 68b) koje glase:

"68a) **stanica tehničkog pregleda** je organizacija ovlaštena od nadležnog organa za obavljanje poslova tehničkog pregleda vozila;

68b) **svjetloodbojni prsluk** je odijevni predmet namijenjen lakšem uočavanju lica koja se na javnom putu nalaze van vozila;"

Iza tačke 69) dodaju se nove tač. 69a) i 69b) koje glase:

"69a) **šinsko vozilo** je vozilo posebno konstruirano i isključivo namijenjeno za vožnju po šinama;

69b) **tahograf** je uređaj ugrađen u motorno vozilo koji bilježi elemente bitne za upotrebu motornog vozila i/ili rada vozača;"

Iza tačke 72) dodaje se nova tačka 72a) koja glasi:

"72a) **tegljač** je motorno vozilo namijenjeno i opremljeno za vuču poluprikolice;"

Tačka 75) mijenja se i glasi:

"75) **tricikl** je motorno vozilo na tri točka simetrično postavljena u odnosu na srednju uzdužnu osu, s toplotnim motorom čija je radna zapremina veća od 50 cm<sup>3</sup> ili čija je konstrukcijski najveća brzina veća od 45km/h;"

Iza tačke 75) dodaje se nova tačka 75a) koja glasi:

"75a) **turistički voz** je skup vozila koji čine vučno vozilo i priključna vozila, namijenjeni za prijevoz putnika u parkovima, hotelsko-turističkim i sličnim naseljima, na površini na kojoj se ne obavlja saobraćaj ili putu na kojem se saobraćaj obavlja u turističke svrhe;"

Iza tačke 78) dodaje se nova tačka 78a) koja glasi:

"78a) **šef stanice tehničkog pregleda** je lice koje je steklo uvjete da vodi stanicu za tehnički pregled vozila;"

Tačka 80) mijenja se i glasi:

"80) vozačka dozvola je javna isprava koju je izdao nadležni organ i kojom se dokazuje pravo upravljanja vozilom određene kategorije ili potkategorije;"

Tačka 82) briše se.

## Član 6.

U članu 10. stav (3) mijenja se i glasi:

"(3) Bliže odredbe o sadržaju i načinu vođenja Centralnog registra pravilnikom propisuje Agencija za identifikacione dokumente, evidenciju i razmjenu podataka Bosne i Hercegovine".

## Član 7.

U članu 11. iza stava (1) dodaje se novi stav (2) koji glasi:

"(2) Radi ispunjavanja zahtjeva sigurnosti saobraćaja, nadležni organ za puteve dužan je projektiranje puteva podvrgnuti sistemu revizije sigurnosti (RSA), a postojeće puteve sistemu provjere sigurnosti (RSI)".

Dosadašnji stav (2) postaje stav (3).

U dosadašnjem stavu (2), koji postaje stav (3), iza riječi "saobraćaja" stavlja se zarez i dodaju se riječi: "sistemu revizije i provjere sigurnosti".

#### Član 8.

U članu 12. riječ "propisane" briše se i na kraju teksta tačka se zamjenjuje zarezom i dodaju se riječi: "u skladu s odgovarajućim propisima".

#### Član 9.

Član 27. mijenja se i glasi:

#### "Član 27.

Vozač je dužan držati vozilo na takvom odstojanju i rastojanju od drugih vozila u saobraćaju da, s obzirom na brzinu kretanja vozila i druge okolnosti u saobraćaju, ne izaziva opasnost i ne ometa druge učesnike u saobraćaju."

#### Član 10.

U članu 29. iza stava (2) dodaju se novi st. (3) i (4) koji glase:

"(3) Osim vozila iz stava (2) ovog člana, posebnim znakom mogu biti obilježena i vozila u kojima se, za vrijeme prevoženja, nalaze lica sa stepenom invaliditeta 100%.

(4) Na posebno označenim mjestima za parkiranje vozila iz st. (2) i (3) ovog člana može se samo parkirati vozilo obilježeno znakom iz st. (2) i (3) ovog člana."

Dosadašnji stav (3) koji postaje stav (5) mijenja se i glasi:

"(5) Bliže odredbe o načinu obilježavanja vozila iz st. (2) i (3) ovog člana pravilnikom propisuje ministar."

#### Član 11.

U članu 35. stav (3) riječ "posebnim" zamjenjuje se riječima: "posebno označenim".

#### Član 12.

U članu 36. stav (3) riječi: "ili mirovanju" brišu se.

#### Član 13.

U članu 39. stav (4) riječi: "3.500 kg" zamjenjuju se riječima: "7.500 kg".

#### Član 14.

U članu 44. stav (1) riječi: "60 km/h" zamjenjuju se riječima: "50 km/h".

#### Član 15.

U članu 46. stav (1) tačka 1) mijenja se i glasi:

"1) na 80 km/h - za autobuse i autobuse s lakom prikolicom, kao i za teretna motorna vozila čija je najveća dozvoljena masa veća od 3.500 kg a manja od 7.500 kg;".

U tački 4) iza riječi "stajanje" stavlja se zarez i dodaju se riječi: "i teretna motorna vozila koja vuku dva priključna vozila;".

Iza tačke 4) dodaje se nova tačka 5) koja glasi:

"5) na 40 km/h - motorno vozilo koje na putu vuče drugo neispravno motorno vozilo, kao i za traktore;".

U dosadašnjoj tački 5), koja postaje tačka 6), na kraju teksta dodaju se riječi: "koji vuku priključno vozilo".

U dosadašnjoj tački 6), koja postaje tačka 7) riječi: "lahki motocikl" zamjenjuju se riječju "moped".

Iza dosadašnje tačke 6) koja postaje tačka 7) dodaje se nova tačka 8) koja glasi:

"8) na 20 km/h - za turistički voz i radnu mašinu".

Iza stava (1) dodaje se novi stav (2) koji glasi:

"(2) Izuzetno od odredbi iz stava (1) ovog člana, kada se kreću autoputem, brzina kretanja za autobuse ograničava se na 100km/h".

Dosadašnji st. (2) i (3) postaju st. (3) i (4).

U dosadašnjem stavu (3) koji postaje stav (4) riječi: "žute boje" zamjenjuju se riječima: "bijele boje".

#### Član 16.

U članu 49. stav (6) iza riječi "traku" dodaju se riječi: "koja se pruža uzduž kolovoza kojim se kreće" a na kraju teksta briše se tačka i dodaju riječi: "u istom ili suprotnom smjeru".

#### Član 17.

U članu 51. stav (3) na kraju teksta tačka se zamjenjuje zarezom, i dodaju se riječi: "i da uređaj za davanje svjetlosnih znakova nije u funkciji reguliranja saobraćaja".

#### Član 18.

U članu 61. tačka 7) iza riječi "jednu" dodaje se riječ "saobraćajnu".

#### Član 19.

U članu 62. stav (1) iza riječi "potrebno" dodaju se riječi: "odstojanju i".

#### Član 20.

U članu 70. stav (1) mijenja se i glasi:

"(1) Na javnom putu van naselja vozač je dužan, u slučaju potrebe zaustavljanja ili parkiranja vozila, kada za to postoji mogućnost, zaustaviti ili parkirati vozilo van kolovoza".

U stavu (2) riječi: "obilježiti sigurnosnim trokutom" zamjenjuju se riječima: "za vrijeme kretanja van vozila označiti se svjetloodbojnim prslukom".

#### Član 21.

U članu 71. stav (1) iza riječi: "parkira vozilo na javnom putu" dodaju se riječi: "gdje je ta radnja dozvoljena".

#### Član 22.

U članu 73. tačka 12) riječi: "invalidna lica" zamjenjuju se riječima: "lica s invaliditetom ako vozilo nije obilježeno znakom iz člana 29. st. (2) i (3) ovog zakona".

Tačka 13) briše se.

#### Član 23.

U članu 74. iza tačke 5) dodaje se nova tačka 6) koja glasi:

"6) na kolovozu s dvije saobraćajne trake gdje se saobraćaj odvija u oba smjera".

#### Član 24.

U članu 76. stav (3) na kraju teksta briše se tačka i dodaju se riječi: "ili vozač vozila".

Stav (5) mijenja se i glasi:

"(5) Premještanje vozila na drugo mjesto uređuje se propisima entiteta, kantona i Brčko Distrikta Bosne i Hercegovine".

#### Član 25.

U članu 77. stav (1) tačka 1) iza riječi "člana" dodaju se riječi: "70. stav (2) i člana".

U stavu (2) riječi: "dovoljnoj udaljenosti koja" zamjenjuju se riječima: "dovoljnom odstojanju koje", a iza riječi: "50 m" dodaju se riječi: "a u naselju 10 m".

#### Član 26.

U članu 81. iza stava (4) dodaje se novi stav (5) koji glasi:

"(5) U saobraćaju na javnom putu radnom mašinom smiju se vući samo priključci za izvođenje radova".

#### Član 27.

U članu 84. iza stava (2) dodaje se novi stav (3) koji glasi:

"(3) Za vrijeme vuče neispravnog vozila, na vozilima moraju biti uključeni uređaji za istovremeno paljenje svih pokazivača pravca".

#### Član 28.

U članu 89. stav (1) briše se.

Dosadašnji st. (2), (3) i (4) postaju st. (1), (2) i (3).

U dosadašnjem stavu (2) koji postaje stav (1) na kraju teksta briše se tačka i dodaju se riječi: "osim lica koje upravlja vučenim vozilom".

U dosadašnjem stavu (4) koji postaje stav (3) riječi: "stava (3)" zamjenjuju se riječima: "stava (2)" a riječi: "i brzina kretanja ne smije biti veća od 40 km/h" brišu se.

#### Član 29.

U članu 90. stav (2) tačka 1) riječi: "paran broj crvenih svjetala" zamjenjuju se riječima: "najmanje dva crvena svjetla".

Stav (6) mijenja se i glasi:

"(6) Na traktoru za vrijeme vožnje po javnom putu mora biti upaljeno žuto rotaciono svjetlo".

#### Član 30.

U članu 99. stav (1) mijenja se i glasi:

"(1) Biciklom na javnom putu smije upravljati lice koje je navršilo 12 godina, a mopedom na javnom putu smije upravljati lice koje je navršilo 14 godina i posjeduje odgovarajući dokument o poznavanju propisa o sigurnosti saobraćaja".

#### Član 31.

Član 102. mijenja se i glasi:

#### "Član 102.

Vozač bicikla, mopeda, lakog motocikla, motocikla, tricikla, lakog četverocikla ili četverocikla i lica koja se prevoze tim vozilima moraju pravilno koristiti zaštitnu kacigu za vrijeme vožnje, a u periodu od prvog sumraka do potpunog svanuća, kao i danju u slučaju smanjene vidljivosti, vozač bicikla mora pravilno koristiti i svjetloodbojni prsluk".

#### Član 32.

U članu 103. dodaje se novi stav (1) koji glasi:

"(1) Zaprežnim vozilom na javnom putu može upravljati lice s navršenih 16 godina života".

Dosadašnji st. (1), (2) i (3) postaju st. (2), (3) i (4).

Iza dosadašnjeg stava (3) koji postaje stav (4) dodaju se novi st. (5), (6), (7) i (8) koji glase:

"(5) Vozač zaprežnog vozila mora voditi zapregu na nepreglednom i neosigurnom prijelazu puta preko željezničke pruge, kao i pri uključivanju u saobraćaj s kolskog ulaza.

(6) Za zaprežno vozilo se, u saobraćaju na putu, sa zadnje desne strane može privezati jedno grlo stoke.

(7) Vozač zaprežnog vozila mora, dok vozi ili vodi zapregu, u periodu od prvog sumraka do potpunog svanuća, kao i danju u slučaju smanjene vidljivosti, nositi i svjetloodbojni prsluk.

(8) Zaprežna vozila koja se kreću jedno iza drugog moraju držati odstojanje najmanje 50m".

#### Član 33.

U članu 104. dodaje se novi stav (1) koji glasi:

"(1) Gonič stoke, ako stoku goni javnim putem, može biti lice s navršenih 16 godina života".

Dosadašnji st. (1) i (2) postaju st. (2) i (3).

Iza dosadašnjeg stava (2) koji postaje stav (3) dodaje se novi stav (4) koji glasi:

"(4) Stoka se na javnom putu smije goniti u grupama i na takvom odstojanju između grupa da takvo kretanje bitno ne utiče na prohodnost puta i sigurnost saobraćaja koji se odvija tim putem."

#### Član 34.

U članu 107. stav (1) mijenja se i glasi:

"(1) Kad se pješak kreće kolovozom na javnom putu van naselja, dužan je kretati se uz lijevu ivicu kolovoza u smjeru kretanja, a noću i danju u uvjetima smanjene vidljivosti mora biti osvijetljen ili označen svjetloodbojnim prslukom, a kretanje u grupi izvoditi krećući se jedan iza drugog".

#### Član 35.

U članu 111. iza stava (3) dodaje se novi stav (4) koji glasi:

"(4) U slučaju iz stava (3) ovog člana na kolovozu s dvije ili više saobraćajnih traka za saobraćaj u istom smjeru, zabranjeno je prolaženje pored vozila koje je zaustavljeno ili usporava ispred pješačkog prijelaza da bi propustilo pješake".

#### Član 36.

U članu 120. stav (1) riječi: "3.500 kg" zamjenjuju se riječima: "7.500 kg".

#### Član 37.

U članu 123. iza riječi "zaustavljati" dodaju se riječi: "niti parkirati".

#### Član 38.

U članu 125. stav (1) riječ "posebnim" briše se.

#### Član 39.

U članu 126. stav (1) riječi: "Državne granične službe BiH" zamjenjuju se riječima: "Granične policije Bosne i Hercegovine".

Stav (5) mijenja se i glasi:

"(5) Uređaji za davanje posebnih svjetlosnih i zvučnih znakova ne smiju se ugrađivati osim na vozila iz stava (1) ovog člana".

#### Član 40.

U članu 127. stav (1) riječi: "knjižicu vozila" zamjenjuju se riječima: "potvrdu o registraciji", a riječi: "i tehničko-konstruktivne mogućnosti vozila" zamjenjuju se riječima: "utvrđene propisima ili saobraćajnim znakom".

#### Član 41.

U članu 128. iza stava (5) dodaje se novi stav (6) koji glasi:

"(6) Teret u rasutom stanju, kada se prevozi na javnom putu, mora biti prekriven na odgovarajući način, tako da se spriječi rasipanje tereta".

#### Član 42.

U III. dijelu Zakona iza poglavlja 26. iza člana 129. dodaje se novo poglavlje 27. koje glasi: "**27. Prijevoz lica vozilima**".

Iza člana 129. dodaju se novi čl. 129a. i 129b. koji glase:

##### "Član 129a.

(1) U motornom vozilu, odnosno na vozilu i priključnom vozilu u saobraćaju na putu, osim u teretnom vozilu policije i oružanih snaga, dozvoljeno je prevoziti onoliko lica koliko je označeno u potvrdi o registraciji, na mjestima koja su za to predviđena.

- (2) Na teretnom vozilu u prostoru za smještaj tereta i priključnom vozilu koje vuče traktor može se prevoziti najviše pet lica, a u tovarnom prostoru motokultivatora mogu se prevoziti najviše tri lica, koja utovaraju ili istovaraju teret ili obavljaju poljoprivredne ili druge radnje.
- (3) Lica iz stava (2) ovog člana koja se prevoze u tovarnom prostoru ne smiju stajati, sjediti na stranicama karoserije, na nestabilnom teretu ili teretu koji prelazi visinu tovarnog sanduka.
- (4) U zatvorenom prostoru vozila koje se ne može iznutra otvoriti ne smiju se prevoziti lica.
- (5) Vozilima organa za izvršenje krivičnih i prekršajnih sankcija smiju se prevoziti lica i to samo za službene potrebe.
- (6) U priključnom vozilu za stanovanje (kamp prikolica) ne smiju se prevoziti lica.
- (7) Vozač ne smije pokrenuti vozilo dok putnici sigurno ne uđu, odnosno izađu iz vozila i dok vrata ne budu zatvorena.
- (8) Za vrijeme kretanja vozila ne smije se uskakati u vozilo, iskakati iz vozila, otvarati vrata, nagnjati se van vozila, isturati dijelove tijela iz vozila i voziti se na vanjskim dijelovima vozila ili na traktorskim prikolicama.
- (9) Izuzetno od stava (8) ovog člana, na vanjskim dijelovima vozila i priključnog vozila mogu se voziti lica koja obavljaju poslove svog radnog mjesta u vezi s namjenom vozila (na vozilima vatrogasne službe, komunalne službe, elektrodistribucije i drugih djelatnosti), dok su na dužnosti, ako je na tim vozilima ugrađena platforma za stajanje i držači.

#### Član 129b.

- (1) Vozač bicikla stariji od 18 godina može na biciklu prevoziti dijete do osam godina starosti ako je na biciklu ugrađeno posebno sjedište, prilagođeno veličini djeteta i čvrsto spojeno s biciklom.
- (2) Dijete mlađe od 12 godina ne smije se prevoziti na mopedu, triciklu, motociklu i četvorociklu.
- (3) U prostoru za smještaj tereta vozila iz člana 129a. stav (2) ovog zakona zabranjeno je prevoziti lica mlađa od 15 godina".

#### Član 43.

U članu 158. iza stava (6) dodaje se novi stav (7) koji glasi:

"(7) Bliže odredbe o načinu prikupljanja i obradi statističkih podataka o saobraćajnim nezgodama pravilnikom propisuje ministar, u saradnji s organima nadležnim za unutrašnje poslove".

#### Član 44.

U članu 159. iza stava (5) dodaje se novi stav (6) koji glasi:

"(6) Bliže odredbe o načinu i postupku uzimanja uzoraka na analizu radi utvrđivanja koncentracije alkohola ili opojnih sredstava u organizmu pravilnikom propisuje ministar, u saradnji s organima nadležnim za zdravstvo i organima nadležnim za unutrašnje poslove".

#### Član 45.

U članu 172. stav (1) na kraju teksta tačka se zamjenjuje zarezom i dodaju riječi: "odgovarajuće kategorije".

Iza stava (2) dodaju se novi st. (3) i (4) koji glase:

"(3) Kandidat za vozača motornih vozila može i prije položenog ispita za vozača upravljati motornim vozilom one kategorije za koju priprema ispit ako vozilom upravlja uz prisustvo instruktora vožnje.

(4) Izuzetno od odredbi stava (1) ovog člana mopedom, traktorom, radnom mašinom i motokultivatorom može upravljati i lice koje posjeduje odgovarajući dokument o poznavanju propisa o sigurnosti saobraćaja".

Dosadašnji st. (3), (4) i (5) postaju st. (5), (6) i (7).

#### Član 46.

Član 177. mijenja se i glasi:

"Član 177.



- (1) Osposobljavanje kandidata za vozača motornih vozila obavlja se prema propisima koje donosi ministar, u saradnji s organom nadležnim za obrazovanje.
- (2) Osposobljavanje kandidata za vozače iz teoretskog i praktičnog dijela obavljaju autoškole po ovlaštenju organa entiteta, kantona i Brčko Distrikta Bosne i Hercegovine nadležnih za obrazovanje, nakon što se utvrdi da ispunjavaju uvjete određene zakonom i propisima donesenim na osnovu zakona.
- (3) Osposobljavanje kandidata za vozača motornih vozila iz prve pomoći obavlja Crveni krst/križ u Bosni i Hercegovini.
- (4) Osposobljavanje kandidata za vozača motornih vozila koji ima fizički invaliditet mora se obavljati na prilagođenom vozilu za lica s invaliditetom koje mora atestirati ovlaštena institucija ili poduzeće.
- (5) Motorno vozilo na kojem se kandidat za vozača motornih vozila osposobljava u praktičnom upravljanju motornim vozilom na putu mora biti označeno posebnim tablicama.
- (6) Tablice iz stava (5) ovog člana imaju oblik kvadrata, plave su boje i na njima je bijelom bojom napisano latinično slovo L.
- (7) Kontrolu nad provođenjem propisa iz stava (1) ovog člana provode organi nadležni za obrazovanje, putem stručnog organa.
- (8) Subjekti iz st. (2) i (3) ovog člana dužni su organu iz stava (7) ovog člana, prilikom kontrole, omogućiti pristup u prostorije, vozila, uvid u tok osposobljavanja i polaganja ispita za vozača motornih vozila, kao i uvid u sva dokumenta kojima se dokazuje ispunjenost uvjeta za rad.
- (9) Bliže odredbe o provođenju kontrole iz stava (7) ovog člana pravilnikom propisuje organ entiteta, kantona i Brčko Distrikta Bosne i Hercegovine nadležan za obrazovanje, u skladu s općim principima za provođenje kontrole propisanim podzakonskim aktom iz st. (10) i (11) ovog člana.
- (10) Bliže odredbe o osposobljavanju za vozača motornih vozila pravilnikom propisuje ministar, u saradnji s organom nadležnim za obrazovanje.
- (11) Bliže odredbe o organiziranju obuke za osposobljavanje iz pružanja prve pomoći licima povrijeđenim u saobraćajnoj nezgodi pravilnikom propisuje ministar, u saradnji s organom nadležnim za zdravstvo".

#### Član 47.

U VIII. dijelu Zakona iza poglavlja 2. iza člana 177. dodaje se novo poglavlje 2a. koje glasi:

**"2a. Sticanje prava osposobljavanja i ispitivanja kandidata za vozača motornih vozila".**

Član 178. mijenja se i glasi:

#### "Član 178.

- (1) Pravo da osposobljava kandidata iz poznavanja propisa o sigurnosti saobraćaja stiče lice - diplomirani saobraćajni inženjer drumskog smjera i koje posjeduje licencu predavača teoretske nastave.
- (2) Pravo da ispituje kandidata iz oblasti propisa o sigurnosti saobraćaja stiče lice s licencom ispitivača teoretskog dijela ispita.
- (3) Pravo da ispituje kandidata iz praktičnog dijela stiče lice s licencom ispitivača iz upravljanja motornim vozilom.
- (4) Pravo da ispituje kandidata iz prve pomoći stiče lice s licencom ispitivača iz poznavanja prve pomoći.
- (5) Lice iz st. (1), (2) i (3) ovog člana, osim dokaza o završenoj školskoj spremi, mora imati vozačku dozvolu.
- (6) Osposobljavanje kandidata za vozača motornih vozila iz pružanja prve pomoći licima povrijeđenim u saobraćajnoj nezgodi obavlja doktor medicine.
- (7) Osposobljavanje kandidata za vozača motornih vozila u praktičnom upravljanju motornim vozilom obavlja instruktor vožnje.
- (8) Bliže odredbe o uvjetima i načinu dobivanja licence iz st. (1), (2), (3) i (4) ovog člana pravilnikom propisuje ministar, u saradnji s organom nadležnim za obrazovanje.

(9) Bliže odredbe o sticanju zvanja instruktora vožnje motornih vozila pravilnikom propisuje ministar, u saradnji s organom nadležnim za obrazovanje".

#### Član 48.

Iza poglavlja 2a. iza člana 178. dodaje se novo poglavlje 2b. koje glasi:

#### **"2b. Potvrda o osposobljenosti".**

Iza člana 178. dodaje se novi član 178a. koji glasi:

#### "Član 178a.

Autoškole, obrazovne ustanove i Crveni krst izdaju potvrde o uspješno završenoj obuci za vozača motornih vozila."

#### Član 49.

U nazivu poglavlja 3. riječi: **"i provjera osposobljenosti"** brišu se.

#### Član 50.

U članu 179. stav (4) mijenja se i glasi:

"(4) Bliže odredbe o načinu i uvjetima organiziranja ispita za vozača motornih vozila pravilnikom propisuje ministar, u saradnji s organom nadležnim za obrazovanje".

#### Član 51.

Član 180. mijenja se i glasi:

#### "Član 180.

(1) Za vrijeme upravljanja motornim vozilom kandidat za vozača mora imati kod sebe uvjerenje da je fizički i psihički sposoban za upravljanje motornim vozilom kao i uvjerenje o položenom ispitu iz poznavanja propisa o sigurnosti saobraćaja na putevima za onu kategoriju za koju se obučava, i dužan ga je pokazati na zahtjev ovlaštenog lica.

(2) Za vrijeme obučavanja kandidata iz upravljanja motornim vozilom instruktor vožnje kod sebe mora imati: vozačku dozvolu, dozvolu instruktora vožnje i dnevnik rada instruktora vožnje i dužan ih je pokazati na zahtjev ovlaštenog lica."

#### Član 52.

Član 181. briše se.

#### Član 53.

Član 182. mijenja se i glasi:

#### "Član 182.

(1) Ministarstvo organizira izradu jedinstvenog kataloga testovnih pitanja.

(2) Organi nadležni za provođenje ispita dužni su formirati ispitne testove na osnovu pitanja iz kataloga iz stava (1) ovog člana.

(3) Na ispitu za vozača motornih vozila Komisija utvrđuje da li je kandidat u dovoljnoj mjeri osposobljen za sigurno upravljanje motornim vozilom određene kategorije prema propisanom programu iz člana 176. ovog zakona.

(4) Na ispitu za vozača motornih vozila kandidat za vozača ne smije se koristiti nedozvoljenim sredstvima."

#### Član 54.

Član 183. mijenja se i glasi:

#### "Član 183.

(1) Organi nadležni za obrazovanje entiteta, kantona i Brčko Distrikta Bosne i Hercegovine dužni su organizirati kontinuirano usavršavanje za lica koja su uključena u proces osposobljavanja i provjere znanja kandidata za vozača motornih vozila.

(2) Organi iz stava (1) ovog člana mogu poslove iz stava (1) ovog člana prenijeti na odgovarajuću strukovnu organizaciju."

#### Član 55.

U članu 184. stav (1) tačka 3) iza riječi "kategorije" dodaju se riječi: "ili potkategorije".

U stavu (2) na početku teksta, dodaju se riječi: "Pored uvjeta iz stava (1) ovog člana".

Tačke 3) i 4) mijenjaju se i glase:

"3) kategorije C i CE pod uvjetom da posjeduje vozačku dozvolu potkategorije C1 ili C1E najmanje jednu godinu;

4) kategorije D i DE i potkategorije D1 i D1E pod uvjetom da posjeduje vozačku dozvolu kategorije C ili CE najmanje dvije godine".

#### Član 56.

U članu 185. stav (5) riječ "do" mijenja se riječju "preko", a riječi: "i motorno vozilo B kategorije s prikolicom čija je najveća dozvoljena masa veća od 750 kg," brišu se.

U stavu (15) riječi: "a manje" zamjenjuju se riječima: "a ne više".

U stavu (19) iza riječi "BE" dodaju se riječi: "i C1E", i na kraju teksta dodaju se riječi: "i D1E".

U stavu (21) iza riječi "upravljati" dodaju se riječi: "mopedom, lakim četverociklom i motokultivatorom".

#### Član 57.

U članu 186. stav (8) slovo "C" briše se.

Stav (9) briše se.

#### Član 58.

U članu 195. tačka 1) mijenja se i glasi:

"1) vozači koji upravljaju motornim vozilima kojima se vrši javni prijevoz i vozači tramvaja - svake tri godine;"

Iza tačke 1) dodaje se nova tačka 2) koja glasi:

"2) instruktori vožnje - prilikom produženja važenja dozvole instruktora vožnje;"

Dosadašnje tač. 2) i 3) postaju tač. 3) i 4).

#### Član 59.

U članu 196. stav (2) riječi: "opravdano posumnja" zamjenjuju se riječju "utvrđi".

Stav (4) mijenja se i glasi:

"(4) Na vanredni ljekarski pregled rješenjem upućuje organ kod kojeg se vozač vodi u evidenciji, u zdravstvenu instituciju koja je ovlaštena za obavljanje ljekarskih pregleda i izdavanje ljekarskih uvjerenja za vozače".

Iza stava (4) dodaje se novi stav (5) koji glasi:

"(5) Vozač kojem je na vanrednom ljekarskom pregledu utvrđena nesposobnost upravljanja određenom kategorijom vozila, nakon otklanjanja ustanovljene nesposobnosti, dužan je izvršiti kontrolni ljekarski pregled u istoj zdravstvenoj instituciji iz stava (4) ovog člana i o tome dostaviti dokaz nadležnom organu koji je izdao vozačku dozvolu".

#### Član 60.

Član 198. mijenja se i glasi:

#### "Član 198.

Bliže odredbe o zdravstvenim uvjetima koje moraju ispunjavati vozači motornih vozila kao i uvjete koje treba da ispunjavaju zdravstvene ustanove za obavljanje zdravstvenih pregleda kandidata za vozače motornih vozila, pravilnikom propisuje ministar, u saradnji s organom nadležnim za zdravstvo."

#### Član 61.

U članu 199. stav (2) mijenja se i glasi:

"(2) Odmor iz stava (1) ovog člana može se koristiti u dva dijela, i to prvi dio u trajanju od najmanje 15 minuta, nakon kojeg slijedi odmor od najmanje 30 minuta, a koji se koristi tokom perioda vožnje iz stava (1) ovog člana".

Iza stava (3) dodaju se novi st. (4), (5), (6) i (7) koji glase:

"(4) Izuzetno od stava (3) ovog člana, dnevno vrijeme vožnje može se produžiti najviše do deset sati, ali ne više od dva puta tokom sedmice, tako da prosječno sedmično radno vrijeme ne smije biti duže od 48 sati.

(5) Tokom vožnje, vozač mora posjedovati dokaze o evidenciji svog rada za taj dan i prethodnih 28 dana, uključujući i potvrdu o slobodnom vremenu.

(6) Vozila iz stava (1) ovog člana moraju imati ugrađen tahograf.

(7) Nova vozila iz stava (1) ovog člana, koja se prvi put registriraju u Bosni i Hercegovini nakon 16.6.2010. godine, moraju imati ugrađen digitalni tahograf."

#### Član 62.

U članu 200. stav (2) riječ "osam" zamjenjuje se riječju "devet".

#### Član 63.

Član 201. briše se.

#### Član 64.

U članu 208. iza stava (4) dodaje se novi stav (5) koji glasi:

"(5) Izuzetno od odredbi stava (4) ovog člana, potvrda o registraciji se može izdati:

1) trajno za:

- oldtajmere,
- vozila koja nisu prvenstveno namijenjena za učešće u saobraćaju (motokultivator, traktor, radna mašina, pčelarsko vozilo, poljoprivredno vozilo i sl.) i
- mopede i lake četvorocikle.

2) s kraćim rokom važenja, koji ne može biti kraći od šest mjeseci, za sljedeće kategorije:

- motocikle, tricikle, četverocikle i lake motocikle."

Dosadašnji st. (5) i (6) postaju st. (6) i (7).

#### Član 65.

U članu 218. stav (1) iza riječi "vozila" stavlja se zarez i dodaju se riječi: "nakon tehničkog pregleda prije prve registracije,".

Stav (3) briše se.

#### Član 66.

U članu 219. iza stava (2) dodaju se novi st. (3) i (4) koji glase:

"(3) Stanica tehničkog pregleda koja ima odobrenje za rad dužna je tehničke preglede obavljati u skladu s ovim zakonom i važećim propisima kojima je regulirana ova oblast.

(4) Organi iz stava (2) ovog člana dužni su najmanje četiri puta godišnje organizirati nadzor nad radom stanica za tehnički pregled vozila".

Dosadašnji st. (3) i (4) postaju st. (5) i (6).

#### Član 67.

U članu 220. stav (3) riječi: "ako bi to izazvalo" zamjenjuju se riječima: "ako takva analiza ne bi izazvala".

#### Član 68.

U članu 224. stav (5) iza riječi: "upravlja vozilom duže od devet sati" stavlja se tačka i ostatak teksta se briše.

#### Član 69.

U članu 225. stav (1) iza riječi: "prema odredbama" dodaju se riječi: "člana 234a.,".

U stavu (5) riječ "deset" zamjenjuje se riječju "sedam".

U stavu (8) broj "15" zamjenjuje se riječju "deset".

U stavu (10) broj "15" zamjenjuje se riječima: "najmanje deset".

Iza stava (13) dodaju se novi st. (14) i (15) koji glase:

"(14) Nadležni organi iz stava (5) ovog člana održavanje predavanja o posljedicama koje proizlaze iz nepoštovanja ili nepoznavanja propisa o sigurnosti saobraćaja na putevima mogu prenijeti na odgovarajuću strukovnu organizaciju.

(15) Bliže odredbe o sadržaju programa i načinu održavanja predavanja o posljedicama koje proizlaze iz nepoštovanja ili nepoznavanja propisa o sigurnosti saobraćaja na putevima i programu i načinu provjere poznavanja propisa o sigurnosti saobraćaja na putevima pravilnikom propisuje ministar, u saradnji s organom nadležnim za obrazovanje i organom nadležnim za unutrašnje poslove".

#### Član 70.

U članu 226. stav (1) iza riječi "pozvan" dodaju se riječi: "ili upućen".

U stavu (4) tačka na kraju teksta se briše i dodaju se riječi: "uz predočavanje dokaza da je zadovoljio na provjeri poznavanja propisa o sigurnosti saobraćaja na putevima".

#### Član 71.

U članu 228. stav (2) riječi: "knjižicu vozila" zamjenjuju se riječima: "potvrdu o registraciji".

#### Član 72.

Član 229. briše se.

#### Član 73.

U članu 230. u cijelom tekstu riječi: "potvrda o vlasništvu" zamjenjuju se riječima: "potvrda o registraciji" u odgovarajućim padežima.

U stavu (1) na kraju teksta briše se tačka i dodaju se riječi: "ili nema propisanu registarsku naljepnicu".

#### Član 74.

U članu 231. stav (2) riječi: "knjižicu vozila" zamjenjuju se riječima: "potvrdu o registraciji".

St. (3) i (4) mijenjaju se i glase:

"(3) Ako vozač, odnosno vlasnik vozila iz stava (2) ovog člana ne preuzme privremeno oduzetu potvrdu o registraciji u roku od tri dana od dana oduzimanja, a potvrda o registraciji se ne vodi u evidenciji organa čije je ovlašteno lice potvrdu oduzelo, ona će biti dostavljena nadležnom organu kod kojeg se vozilo vodi u evidenciji.

(4) Vlasnik vozila ne plaća troškove vanrednog tehničkog pregleda na koji ga je uputio nadležni organ, ako se na pregledu utvrdi da je vozilo tehnički ispravno."

#### Član 75.

U članu 232. stav (1) iza tačke 3) dodaje se nova tačka 3a) koja glasi:

"3a) ako postupi u suprotnosti sa odredbama člana 19. ovog zakona;"

Tačka 6) briše se.

U stavu (2) iza riječi "preduzeću" stavlja se zarez, briše se riječ "ili", i na kraju teksta briše se tačka i dodaju riječi: "ili drugom organu".

#### Član 76.

U članu 233. stav (1) iza tačke 1) dodaje se nova tačka 1a) koja glasi:

"1a) proizvodi, prepravlja i pušta u saobraćaj vozilo suprotno odredbama člana 35. stav (1) ovog zakona;"

U tački 2) na kraju teksta dodaju se riječi: "i člana 82. ovog zakona".

U tački 15) riječi: "stav (3)" brišu se.

U tački 18) iza riječi: "30 minuta" dodaju se riječi: "ili kad u toku 24 sata upravlja duže od 9 sati" a u zagradi riječi: "stav (1)" zamjenjuju se riječima: "st. (1) i (3)".

Tačka 20) briše se.

U stavu (2) iza riječi "preduzeću" stavlja se zarez, briše se riječ "ili", i na kraju teksta briše se tačka i dodaju riječi: "ili drugom organu".

Stav (3) briše se.

#### Član 77.

U članu 234. stav (1) riječi: "400,00 KM" zamjenjuju se riječima: "500,00 KM".

Tačka 6) mijenja se i glasi:

"6) postupa suprotno odredbama člana 26. stav (1) ovog zakona;"

U tački 8) riječi: "stav (3)" mijenjaju se riječima: "stav (4)".

Iza tačke 9) dodaje se nova tačka 9a) koja glasi:

"9a) naredi ili dozvoli, u pogledu smještaja tereta na vozilu ili u pogledu označavanja tereta, postupanje suprotno odredbama člana 128. ovog zakona;"

Tačka 15) mijenja se i glasi:

"15) ako postupi suprotno odredbama člana 162. stav (1), 166. stav (3), 167. stav (1) i 169. stav (1) ovog zakona;"

Iza tačke 16) dodaje se nova tačka 16a) koja glasi:

"16a) ne podnese podatke o identitetu lica kojem je dao vozilo na upravljanje;"

U tački 17) broj "(183)" zamjenjuje se brojem "(177)".

U tački 19) riječi: "zdravstvenog pregleda" zamjenjuju se riječima: "ljekarskog uvjerenja".

U tački 25) riječi: "saobraćajne dozvole" zamjenjuju se riječima: "potvrde o registraciji".

U tački 26) riječi: "člana 217." zamjenjuju se riječima: "čl. 217. i 219".

U stavu (3) iza riječi "preduzeću" stavlja se zarez, briše se riječ "ili", i na kraju teksta briše se tačka i dodaju riječi: "ili drugom organu".

Stav (4) briše se.

#### Član 78.

Iza člana 234. dodaje se novi član 234a. koji glasi:

##### "Član 234a.

(1) Novčanom kaznom u iznosu od 400,00 KM do 1.000,00 KM kaznit će se za prekršaj:

1) lice koje ometa saobraćaj, oštećuje puteve, objekte i opremu na putu (član 3. stav (2));

2) lice koje koristi prostor iznad kolovoza, u visini od 4,5m do 7m, suprotno odredbama člana 17. ovog zakona;

3) lice koje postupa suprotno odredbama člana 19. ovog zakona;

4) vozač koji upravlja ili počne upravljati vozilom u saobraćaju na putu ili instruktor vožnje dok osposobljava kandidata za vozača motornog vozila u praktičnom upravljanju vozilom, kod kojeg se utvrdi količina alkohola u krvi preko od 2g/kg (član 174. (2));

5) vozač koji se vozilom na putu u naselju kreće brzinom koja je više od 50 km na sat veća od dozvoljene brzine (čl. 44. i 46. st. (1) i (2)).

(2) Za prekršaje iz stava (1) tač. 4) i 5) ovog člana vozaču ili instruktoru vožnje uz kaznu će se izreći zaštitna mjera zabrane upravljanja motornim vozilom u trajanju od dva mjeseca do šest mjeseci i dva kaznena boda.

(3) Za prekršaje iz stava (1) ovog člana kojim je izazvana saobraćajna nezgoda učinilac će se kazniti novčanom kaznom u iznosu od 1.000,00 KM do 5.000,00 KM, a vozaču će se uz kaznu izreći zaštitna mjera zabrane upravljanja motornim vozilom u trajanju od šest mjeseci."

#### Član 79.

U članu 235. stav (1) tačka 2) riječi: "stav (3)" brišu se.

U tački 3) iza riječi: "30 km na sat" dodaju se riječi: "do 50 km na sat".

Iza tačke 14) dodaje se nova tačka 14a) koja glasi:

"14a) vozač koji počne preticanje neposredno ispred tunela i u tunelu koji po smjeru kretanja ima samo jednu saobraćajnu traku suprotno odredbama člana 61. stav (1) tačka 7) ovog zakona;"

Iza tačke 17) dodaje se nova tačka 17a) koja glasi:

"17a) vozač vozila koje prevozi opasne materije, ako ne drži svoje vozilo na propisanom odstojanju od istog takvog vozila ispred sebe u skladu s članom 97. stav (3) ovog zakona;"

Iza tačke 24) dodaje se nova tačka 24a) koja glasi:

"24a) vlasnik vozila koji ne podnese podatke o identitetu lica kojem je dao vozilo na upravljanje u skladu s članom 172. stav (4) ovog zakona;"

U tački 26) riječ "preko" zamjenjuje se riječju "od" i na kraju teksta se dodaju riječi: "do 2g/kg".

U tački 28) riječi: "član 185." zamjenjuje se riječima: "član 187. stav (2)".

Iza tačke 28) dodaje se nova tačka 28a) koja glasi:

"28a) lice koje upravlja motornim vozilom suprotno odredbama člana 188. ovog zakona;"

U tački 32) riječi: "saobraćajne dozvole" zamjenjuju se riječima: "potvrde o registraciji".

Tačka 35) briše se.

U stavu (3) iza riječi: "a vozaču" dodaju se riječi: "izuzev vozača iz stava (1) tačke 27) ovog člana".

U stavu (4) iza riječi: "vozaču ili vozaču-instruktoru" dodaju se riječi: "izuzev vozača iz stava (1) tačke 27) ovog člana".

#### Član 80.

U članu 236. stav (1) tačka 6) mijenja se i glasi:

"6) vozač koji postupava suprotno odredbama člana 39. stav (4) ovog zakona;"

U tački 9) riječi: "član 58." zamjenjuju se riječima: "član 57.".

Iza tačke 10) dodaje se nova tačka 10a) koja glasi:

"10a) lice koje postupava suprotno odredbama člana 79. stav (2) ovog zakona;"

Tačka 14) mijenja se i glasi:

"14) gonič stoke koji postupava suprotno odredbama člana 104. ovog zakona;"

U tački 20) riječi: "stav (2) tačka 1." brišu se.

Tačka 26) briše se.

Iza tačke 27) dodaje se nova tačka 27a) koja glasi:

"27a) kandidat za vozača i instruktor vožnje ako postupe suprotno odredbama člana 180. ovog zakona "

U tački 29) riječi: "stav (4)" zamjenjuju se riječima: "stav (5)".

U tački 30) riječi: "stav (5)" zamjenjuju se riječima: "stav (6)".

#### Član 81.

U članu 237. stav (1) iza tačke 1) dodaje se nova tačka 1a) koja glasi:

"1a) lice koje postupava suprotno odredbama člana 36. stav (3) ovog zakona;"

U tački 10) iza riječi: "člana 90." dodaju se riječi: "st. (2), (3), (4) i (5)".

U tački 15) iza riječi "putu" dodaju se riječi: "ne koriste svjetloodbojni prsluk ili".

Iza tačke 26) dodaje se nova tačka 26a) koja glasi:

"26a) vozač koji upravlja ili počne upravljati vozilom u saobraćaju na putu ili instruktor vožnje dok osposobljava kandidata za vozača u praktičnom upravljanju vozilom kod kojeg se utvrdi da količina alkohola u krvi prelazi 0,0g/kg do 0,3g/kg (član 174. stav (3));".

## Član 82.

U članu 238. stav (1) iza tačke 7) dodaje se nova tačka 7a) koja glasi:

"7a) vozač koji se vozilom na putu u naselju kreće brzinom koja je 10-20 km/h veća od dozvoljene, odnosno vozač koji se vozilom na putu van naselja kreće brzinom koja je od 20-30 km/h veća od dozvoljene (član 44. i član 46. st. (1) i (2));".

Iza tačke 10) dodaje se nova tačka 10a) koja glasi:

"10a) vozač koji obavlja preticanje i obilaženje suprotno odredbama člana 58. ovog zakona;"

U tački 13) iza riječi: "člana 70." dodaju se riječi: "st. (1) i (3)".

Tačka 14) briše se.

U tački 24) iza riječi "vožnje" dodaju se riječi: "a u periodu od prvog sumraka do potpunog svanuća, kao i danju u slučaju smanjene vidljivosti, i svjetloodbojni prsluk".

U tački 25) iza riječi: "na putu" dodaju se riječi: "ili lice koje ne ispunjava uvjete za upravljanje zaprežnim vozilom, ili lice koje se na nepropisan način prevozi vozilom".

Tačka 27) briše se.

Iza tačke 35) dodaje se nova tačka 35a) koja glasi:

"35a) Vozači vozila i lica koja postupaju suprotno odredbama čl. 129a. i 129b. ovog zakona;"

U tački 37) riječi: "stav (9)" zamjenjuju se riječima: "stav (10)".

## Član 83.

U članu 239. u stavu (1) tački 12) riječi: "čl. 55 i" zamjenjuju se riječju "član".

U tački 17) iza riječi: "člana 81." dodaju se riječi: "i člana 82.".

Tačka 20) mijenja se i glasi:

"20) vozač koji neispravno vozilo vuče suprotno odredbama člana 88. ovog zakona;"

U tački 21) riječ "tač." mijenja se riječju "stav" a na kraju teksta dodaju se riječi: "kao i vozač koji upravlja traktorom bez upaljenog žutog rotacionog svjetla (član 90. stav (6))".

Tačka 22) mijenja se i glasi:

"22) gonič stoke koji stoku ne drži u skladu s odredbama člana 104. st. (2) i (4) ovog zakona;"

U tački 29) riječi: "stav (5)" zamjenjuju se riječima: "stav (7)".

U tački 30) riječi: "član 183. stav (1)" zamjenjuju se riječima: "član 177. stav (5)".

U tački 33) riječi: "saobraćajnu dozvolu" zamjenjuju se riječima: "potvrdu o registraciji".

## Član 84.

Iza člana 239. dodaje se novi član 239a. koji glasi:

### "Član 239a.

(1) Kada nadležni organ iz člana 177. stav (7) ovog zakona u obavljanju nadzora nad radom autoškola utvrdi da se autoškola u obavljanju svoje djelatnosti ne pridržava Zakona ili da ne ispunjava propisane uvjete, organ nadležan za obrazovanje će rješenjem odrediti da se utvrđeni nedostaci otklone i zabranit će obavljanje jednog dijela osposobljavanja ili cjelokupnog osposobljavanja, dok se utvrđeni nedostaci ne otklone, ako je to potrebno u pogledu prirode nedostataka.

(2) Organ nadležan za obrazovanje može rješenjem zabraniti rad autoškoli ili odjeljenju autoškole u trajanju do dva mjeseca ako se nadležnom organu iz stava (1) ovog člana onemogućiti ili ometa provođenje kontrole.

(3) Organ nadležan za obrazovanje može licu koje obavlja osposobljavanje kandidata iz poznavanja propisa o sigurnosti saobraćaja ili instruktora vožnje koji obavlja osposobljavanje kandidata za vozača motornih vozila u praktičnom upravljanju vozilom, ako osposobljavanje ne obavlja u skladu s važećim propisima, privremeno oduzeti licencu odnosno dozvolu instruktora vožnje na period od tri do šest mjeseci.

(4) Kandidatu za vozača motornih vozila koji na ispitu postupa suprotno odredbama člana 182. stav (4) ovog zakona organ nadležan za obrazovanje može zabraniti izlazak na ispit u periodu do šest mjeseci od dana izlaska na ispit na kojem je prekršaj počinjen.



(5) Ako nadležni organ iz člana 219. stav (2) ovog zakona utvrdi da stanica tehničkog pregleda obavlja tehničke preglede suprotno pozitivnim propisima, izdat će rješenje o privremenoj zabrani rada do otklanjanja nedostataka.

(6) Nadležni organ iz člana 219. stav (2) ovog zakona rješenjem će privremeno zabraniti rad i odrediti period za otklanjanje nedostataka stanici tehničkog pregleda za koju utvrdi da:

- 1) prilikom tehničkog pregleda vozila koristi neumjeren ili neispravan uređaj ili opremu;
- 2) objekat (prostor) ne zadovoljava propisane uvjete;
- 3) tehnički pregled vozila obavlja lice koje nema licencu".

#### Član 85.

Naziv dijela XII. ovog zakona mijenja se i glasi:

### **"XII STRATEGIJA SIGURNOSTI SAOBRAĆAJA I VIJEĆE ZA SIGURNOST SAOBRAĆAJA".**

U članu 251. iza stava (4) dodaje se novi stav (5) koji glasi:

"(5) Za obavljanje poslova iz stava (1) ovog člana vijeća za sigurnost saobraćaja mogu formirati i entiteti i Brčko Distrikt Bosne i Hercegovine, kao i niži nivoi vlasti".

#### Član 86.

Iza člana 251. dodaje se novi član 251a. koji glasi:

##### "Član 251a.

(1) Ministarstvo je dužno da, u saradnji s nadležnim organima entiteta i Brčko Distrikta Bosne i Hercegovine, izradi Strategiju sigurnosti saobraćaja na putevima u Bosni i Hercegovini (u daljnjem tekstu: Strategija).

(2) Prije nego što Vijeće ministara Bosne i Hercegovine razmatra Strategiju, predlagač je obavezan da pribavi mišljenje vijeća za sigurnost saobraćaja.

(3) Strategiju usvaja Parlamentarna skupština Bosne i Hercegovine i odnosi se na period od pet godina.

(4) Strategija sadrži značajna obilježja postojećeg stanja sigurnosti saobraćaja, dugoročne i kratkoročne ciljeve, smjernice, ključne oblasti rada i rokove za donošenje plana za provođenje Strategije. Strategija polazi od principa proklamiranih standardima Evropske unije, međunarodnih konvencija i sporazuma čija je potpisnica Bosna i Hercegovina.

(5) Akcioni plan za provođenje Strategije usvaja Vijeće ministara Bosne i Hercegovine i vlade entiteta i Brčko Distrikta Bosne i Hercegovine u istom tekstu.

(6) Ministarstvo podnosi izvještaj o provođenju Strategije Parlamentarnoj skupštini Bosne i Hercegovine jednom godišnje.

(7) Ministarstvo podnosi izvještaj o izvršenju Akcionog plana za provođenju Strategije Vijeću ministara Bosne i Hercegovine i vladama entiteta i Brčko Distrikta Bosne i Hercegovine jednom godišnje.

(8) Izvještaje iz st. (6) i (7) ovog člana, prije upućivanja u proceduru usvajanja, razmatra vijeće za sigurnost saobraćaja i daje mišljenje o njima".

#### Član 87.

U članu 252. tačka 10) riječi: "član 178." zamjenjuju se riječima: "član 177.".

U tački 11) riječi: "za ispitivača" brišu se, a riječi: "član 179." zamjenjuju se riječima: "član 178.".

U tački 12) riječi: "član 181." zamjenjuju se riječima: "član 178.".

U tački 13) riječi: "član 183." zamjenjuju se riječima: "član 177.".

U tački 17) iza riječi "vozila" dodaju se riječi: "kao i uvjeti koje moraju da ispunjavaju zdravstvene ustanove za obavljanje zdravstvenih pregleda kandidata za vozače motornih vozila".

Iza tačke 22) dodaju se nove tač. 23), 24), 25), 26) i 27) koje glase:

"23) načinu prikupljanja i obradi statističkih podataka o saobraćajnim nezgodama (član 158.);

24) načinu i postupku uzimanja uzoraka na analizu radi utvrđivanja koncentracije alkohola ili opojnih sredstava u organizmu (član 159.);

- 25) općim uvjetima za vršenje kontrole nad provođenjem propisa iz osposobljavanja (član 177. stav (9));
- 26) načinu i uvjetima organiziranja ispita za vozača motornih vozila (član 179.);
- 27) vijeću za sigurnost saobraćaja (član 251.)".

#### Član 88.

Iza člana 252. dodaje se novi član 252a. koji glasi:

##### "Član 252a.

- (1) Ovlašćuje se Agencija za identifikacione dokumente, evidenciju i razmjenu podataka Bosne i Hercegovine da donese bliže propise o sadržaju i načinu vođenja Centralnog registra (član 10.).
- (2) Ovlašćuju se nadležni organi entiteta i Brčko Distrikta Bosne i Hercegovine da donesu bliže propise o načinu formiranja i radu školskih saobraćajnih patrola (član 2.)".

#### Član 89.

U članu 253. iza stava (1) dodaju se novi st. (2), (3) i (4) koji glase:

"(2) Odredbe člana 225. st. (5), (8) i (10) ovog zakona primjenjuju se nakon proteka perioda od godinu dana od dana stupanja na snagu ovog zakona, do kada će se primjenjivati prethodna ograničenja bodova.

(3) Ministarstvo je dužno organizirati izradu kataloga testovnih pitanja iz člana 182. stav (1) ovog zakona i objaviti ga u roku od šest mjeseci od dana stupanja na snagu ovog zakona.

(4) Danom stupanja na snagu ovog zakona saobraćajna dozvola važi kao potvrda o registraciji.

(5) Odredba člana 90. stav (6) ovog zakona za traktore se primjenjuje nakon isteka roka od šest mjeseci od dana stupanja na snagu ovog zakona".

#### Član 90.

(1) Ovaj zakon stupa na snagu osmog dana od dana objavljivanja u "Službenom glasniku BiH".

(2) Ovaj zakon objavljuje se i u službenim glasilima entiteta i Brčko Distrikta Bosne i Hercegovine.

PSBiH, broj 517/10  
28. maja 2010. godine  
Sarajevo  
Predsjedavajući  
Predstavničkog doma  
Parlamentarne skupštine BiH  
**Niko Lozančić**, s. r.  
Predsjedavajući  
Doma naroda  
Parlamentarne skupštine BiH  
**Sulejman Tihčić**, s. r.